

СЕРГЕЙ НИКОЛАЕВЛАН — 90 ИЙ

Тений 23 мартыште Марий Эл Республикын литератур общественностьшо марий драматург, кумдан палыме калык писатель Сергей Николаевич Николаевлан 90 ий темме кечым палемдаш тўнгалеш. Морко марийын лўмжō республикысе калыклан да ўрдыж велнат кумдан палыме. Тудын эн сай пьесыже-влак "Салика", "У саска", "Айвика", "Акпарс", "Ўжара" калыкын йўратыме произведенийышкыже савырненыт да марий театрын, художественный самодетельность коллектив-влакын репертуарышкышт келгын шыненыт.

Литературышто да искусствышто заслугылан СССР Верховный Советын Президиумжо Сергей Николаевым Трудовой Йошкар Знамя да "Знак почета" орден дене наградитлен, а Марий республикын Верховный Совет Президиумжо почетан икмыняр грамот дене, да Марий республикын калык писательже, искусствын заслуженный деятельже лўмым пуэн.

Сергей Николаев 1908 ий 23 мартыште Овдасола ялысе кресаньык ешеш шочын.

1924 ийыште С. Николаев Арын шымияш школым сайын тунем пытара да вараже комсомолын Морко канткомжо, умбакыже тунемаш манын, Краснококшайскышке колта. Тудым Марпедтехникум пелен шымияш опытно-показательный школын 7-ше классышкыже тунемаш налыт. Школым тунем лекмеке, 1925 ий шыжым, Марпедтехникумын икымше курсышкыжо кусарат. Тушто тудо туныктышын специальностьшым налеш да тиде школыштак шочмо йылмым да литературым туныкта. Тыгеракын икымше шонымашыже шукталтеш. Вараже мемнан землякна тиде техникумышто драмкружокым почеш. Тудо граждан сар жапыште ялыште классовый кучедалмаш нерген "Ош когарш" пьесым возаш



шонен пышта. Вес ийынже пионер да тунемше-влакын илышышт гыч "Тревога" пьесе шочеш, 1931 ийыште посна книга дене савыкталтеш. Кокымшо шонымашыжат шукталте — тўнгалше драматург лиеш.

1931 гыч 1933 ий марте С.Н. Николаев Москосо пединститутышто шинчымашым пога, но кумшо курс гыч тунеммыжым кўрлеш да еш амаллан кōра Йошкар-Олашке толеш, ик ий Мароблонышто ышта, тунамак марий йылме дене учебникым лукмаште тырша. 1936 ийыште Марпединститутым пытара. Тиде ийыштак "Полатовын сўанже" музыкальный пьесым воза. Тиде пьесе

1938 ий апрельыште "Салика" лўм дене Маргостеатрыште шындалтеш.

Спектакль сенымашым конда да Сергей Николаевынат у драматический произведенийлан кумылжо шулдыранеш. Тыге творческий корныжо тўнгалеш да кумшо шонымашыжат шукталтеш — профессиональный драматург лиеш.

Марий калыкын кызытсе да ожнысо илышыже нерген С.Н. Николаевын 1930 ий гыч 15 драмыже да музыкальный пьесыже погына. Тўн драматический произведенийже-влак: "Салика", "Айвика", "Акпарс", "Ўжара", "Лейтенант Огнев", "Шинелян ўдыр", "У саска", "Элцет серыште" да молат.

С.Н. Николаевын творчествоштыже кугу верым историко-революционный тематике налеш. Тидын деч посна элнан эрыкше да независимостьшо верч, совет калыкын пиалан илышыже верч кучедалмашым келгын да раш почын пуэн.

С.Н. Николаев илыш гыч 87 ияш каен да калыкын шарнымашешыже тудо кызыт мартеат талантан драматург, тале общественный деятель семын колеш.

Г. БЕКЕШЕВ.